

2018-mut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq

(Siullermeernera)

Inuiaqatigiinni assigiinnerulerneq. Tassaapput Naalakkersuisut anguniagaasa angisoorsuit ilaat. Anguniagaq imatut akerliuffigisariaqanngilaq. Inuiaqatigiimmi assigiinngippallaaraangata mumisitsinissaq tunngavilersorneqalersarpoq. Aappaatigulli nunarsuup oqaluttuarisaanerani takuneqarnikuupput misiliinerit inuit tamarluinnaasa assigiimmik atugaqalersikkumallugit. Aamma tamanna imatut iluatsinneqanngisaannarpoq ineriartortitsiniartut siuariartortitsiniartullu iluanaarniarlutik qaarsillaffeeruttarmata. Apeqqutaavoq qanoq iliorluni assigiinnerup eqeersimaarnerullu oqimaaqatigiinnerat eqqortoq pilersinneqarsinnaanersoq. Uanga isumaqarpunga atungarliortortagut oqilisaattariaqarigut ingerlalluartut artukkernagit.

Allatut oqaatigalugu oqartoqarsinnaavoq sulineq imminut akilersinnaasariaqartoq. Ullumikkummi taamaangilluinnarpoq. Inuit angerlarsimaffitik ilaqtatillu qimallugit nunarsuup sinneranut sumuugaluarnersoq suliarortartut ataqqivakka. Taamatulli oqareerlunga taava eqqortuusinnaanngilaq sulisussanik tikisitsiortorneq uffa inuppassuit suliffissaaleqigaluartut. Imaasinnaavoq tamatumunnga pissutaasoq sulinerup akilersinnaannginnera. Tassanilu iliuuseqartariaqarpugut suliffillit aningaasaataannik arsaartorunnaarlugit.

Aammali aningaasanut inatsisissatut siunnersuut pitsaasortaqarpoq. Isumaqaavunga siunertaamat aalisarnerup iluani pisuussutit assigiimmik akileraaruteqarnissaat anguniartariaqartoq, taamaasilluta qularnaarsinnaaniassagatsigu tamatsinnut akiliisoqartarnissaa, tamatta ataatsimoorluta pisuussutitsinnik atuisoqarsimatillugu.

Sanaartugassanut annertuunut aningaasaliissutit eqqarsaatigalugit soorlu maannakkut timmisartunut sulusalinnut mittarfinnik sanaartornialersugut, tassani nutaanik mittarfiliortiterniarnermut atatillugu aalajangiinissamut periuserineqartut isumakulunnartoqartippakka. Allaanngilaq mittarfiliortiternerit sukkanerpaamik sanaartortinniarnaqartut, inuiaqatigiit ataatsimut

anigaasarsiornerannut atatillugu eqqarsaatigillannguarnagu ilumut aaqqiissut tamanna tamanit aaqqiissutissanit pitsaanerpaajunersoq. Aamma allaanngilaq mittarfiit ingerlanneqarnissaat missingersuutitut ilanngunneqarsimanngitsoq. Taamatuttaaq aamma eqqarsarnartoqartippara Naalakkersuisut kissaatigimmassuk anigaasanut inatsisissap aappassaaneerneranut pingajussaaneerneranullu atatillugu allannguutissanik siunnersuuteqarniarmata qularnaarumallugu anigaasaleeqqittoqarnissaa. Siunnersuummi tamanna aallaqqaammulli takuneqarsinnaasariaqaraluarpoq.

Taamatulli oqareerlunga oqaatigisinnaavara ataatsikkoortitsilluni pingaarnersiunermit tunngaviusumik isumaqataangama taamatullu neriuutigalugu tamanna akisussaassuseqartumik sulinissamut neriorsuutaasoq asuli oqaaseqarniutiginnarlugu oqaasiunani.

Anigaasanut Inatsisissatut siunnersuutip aappassaaneerneqannginnerani Anigaasaqarnermut Akileraartarnermullu Ataatsimiititaliami suliarineqarnissaa innersuuppara.